



رسالتان موجزتان
في الزكاة والصوم

BARRUU WAA'EE SOOMAAFI ZAKAA



OROMO
OROMOO
أورومو

Qopheessaan

Shaykh Abdul Aziiz Ibn Baaz

Kan haik: Gaali Abbaaboo

Gulaala: ustaz Jamaal Muhamma



OROMO
OROMOO
أورومو

رسالتان موجزتان في الزكاة والصوم

تأليف

سماحة الشيخ عبد العزيز بن باز

ترجمة

الداعية غالى أبابور

مراجعة

الداعية جمال محمد أحمد



أُعد هذا الكتاب وصمّم من قبل مركز أصول، وجميع الصور المستخدمة في التصميم يملك المركز حقوقها، وإن مركز أصول يتبع لكل مسلم طباعة الكتاب ونشره بأي وسيلة، بشرط الالتزام بالإشارة إلى المصدر، وعدم التغيير في النص، وفي حالة الطباعة يوصي المركز بالالتزام بمعاييره في جودة الطباعة.

- +966 504 442 532
- ☎ +966 11 445 4900
- 📠 +966 11 497 0126
- ✉ P.O.BOX 29465 Riyadh 11457
- ✉ osoul@rabwah.com
- 🌐 www.osoulcenter.com

بِسْمِ اللَّهِ الرَّحْمَنِ الرَّحِيمِ
Bismillaahi Rrahmaani Rrahiim



DURE

Maqaa Rabbii akkaan marafataa rahmata godhaa ta'eetiin

Faaruun kan Rabbii tokkichaati. Rahmanniifi nageenyi Nabiyyii booda isaatii nabiyyiin biraan hin jirre irra haa jiraatu.

Kana booda: barruun tuni waaye zakaafii soomanaa dubbatti. Isaan kuni lameen arkaana islaamaa kan sadaffaafii afrappaati. Zakaaf soomanni Islaama keessatti iddo guddoo qaban. Baruumsa isaan lameenii bal'inaan akka muslimni hubatuuf jecha bifa kitaabaatiin kophaa baafamee qophaayee jira. Kunoo kana dubbisaa gaarii.





BARRUU LAMMAFFAA ZAKAA BAASUU

Wantoonni jechoota kana barreessuutti na kakaase zakaa ishee Muslimoonni baay'een waa'ee ishee keessatti laafan, gaheen ishee guddaafi arkaana Islaamaa isa ijarsi Islaamaa isarratti malee hin dhaabanne shanan keessaa tokko ta'uu walii bifaa sharii'aan karaa godheen baasuu dhiisan keessatti namoota gorsuufi dirqamummaa ishee yaadachiisuudhaafi. Nabiyyiin ﷺ ni jedhan: "Islaamni waa shan irratti ijaarame: 'dhugaan gabbaramaan Rabbiin malee hin jiru; Muhammad immoo Ergamaa isaatii' ragaa bahuu, salaata sirna ishee guutanii salaatu, zakaa kennuu, Ramadaana soomuufi Manicha (ka'abaa) hajja'uudha." Muttafaqun alayhi.

Zakaa Muslimoota irratti dirqama godhuun irra mullataa miidhagina Islaamaati; akkasumas sababa faayidaan ishee baay'ee ta'eef, hiyyeeyyiin Muslimoota ta'an itti haajomuun dirqama ta'eef karaa ittiin Islaamni dhimma miseensa isaa tiksiiisa guddaadha. Bu'aa ishee keessaa tokko haada (finyoo) jaalalaa jidduu dureessaafi hiyyeessaatti raggaasisuudha. Sababni isaas lubbuun kamuu nama tola itti oole jaalachuu irratti uumamte waan ta'eefi.





Kan biroo immoo lubbuu yakkaafi doynummaa irraa qulqulleessuu, haala doynummaa irraa ishee fageessuudha. Kana immoo Qur'aanni akeekee jira. Rabbiin ni jedhe: *“Qabeenya isaanii irraa sadaqaa isheedhaan isaan qulqulleessituufi isaaniif dabaltuun fuudhi.”* (Attawbaa: 103).

Ammas bu'aa zakaa irraa kan biroo isheen amala arjummaafi abbaa dhimmaatiif garaa laafuuti.

Akkasumas barakaa, dabalataafi bakka bu'aa Rabbiin biraaj argamsiifachuudha. Rabbiin ol ta'e ni jedhe: *“waan isin homa ta'e irraa kennattan Inni bakka isa buusa; Inni caalaa warra sooraniiti.”*

Nabiyyiin ﷺ hadiisa sahiiha keessatti ni jedhan: Rabbiin ol ta'e ni jedha: “yaa ilma Aadam arjoomi; siif arjoomama.”

Kana malees zakaan bu'aalee biroo baay'ee qabdi.

Nama ishee doynoome yookiin ishee kennuu keessatti hanqise ilaalchisee dinniinni guddaan dhufeera. Rabbiin ol ta'e ni jedhe:

﴿وَالَّذِينَ يَكْرِهُنَّ الْأَذْهَبَ وَالْفَضَّةَ وَلَا يُفْعَلُونَ فِي سَبِيلِ اللَّهِ وَيَتَرَهُمْ
بِعَذَابٍ أَلِيمٍ ﴾ ٢٥ ﴿ يَوْمَ يُحْمَى عَلَيْهَا فِي نَارِ جَهَنَّمَ فَتُكَوَّنُ بِهَا جِهَاهُهُمْ
وَجُوُهُهُمْ وَظُهُورُهُمْ هَذَا مَا كَسَرْتُمْ لِأَنْفُسِكُمْ فَلَدُؤُوا مَا كُنْتُمْ تَكْرِهُنَّ﴾
[التوبه: ٢٤-٢٥]

“Warra meetaafi warqee kuusatan, kan karaa Rabbiin keessatti ishee hin sadaqanne, adaba laalessaan isaan

gammachiisi. Guyyaa ibidda jahannam keessatti ishee irratti ho'ifamu, kan addi isaanii, cinaachi isaaniittiif dugdi isaanii isheen gubamu “Kun waan isin lubbuu keessaniif kuusaa turtaniidha; waan kuusaa turtan dhandhamaa” (jedhamu).”

Wanti zakaan isaa hin kennamne hunduu kuusaa abbaan isaa Guyyaa Qiyaamaa ittiin adabamuudha. Kana hadiisni sahiihiin Nabiyyii ﷺ irraa odeeoffame akeekeera. Nabiyyiin ﷺ ni jedhan: *“abbaan kuusaa qabeenya warqeefi meetaa kan haqa isaa hin dhaqqabsiifne (zakaa isaa hin kennine) yeroo Guyyaan Qiyaamaa gahe maaddii sibiilaa ibidda irraa ta'e isaaf taasifamee cinaachi isaafi illeen (cinaan adda) isaa ittiin gubamu malee hin hafu. Hanguma qabbanooftuun isaaf deebifamti. Kun immoo hanga Rabbiin guyyaa dheerinni isaa wagga kuma shantama ta'e keessatti jidduu garboota isaa mурteessutti itti fufa. Ergasii karaan isaa gara jannataa yookiin ibiddaa ta'uun argama.”* Sana booda Ergamaan Rabbii ﷺ abbaa gaalaa, kan looniifi busaa'ee warra zakaa isaanii hin kennine dubbatanii akka isaan Guyyaa Qiyaamaa ittiin adabamanus himan.

Ammas Ergamaa Rabbii ﷺ irraa hadiisa sahiihaan dhufee ni jedhan: “Namni Rabbiin qabeenya isaaf kenninaan zakaa isaa kennuu dhiise, guyyaa Qiyaamaa jawwee (bofa guddaa) mataa moluu kan gaafa lama qabu taasifamee Guyyaa Qiyaamaa isatti fannifama. Ergasii hidhii isaa lamaan qabateeti ‘ani kuusaa keeti, ani qabeenya keeti’ isaan jedha.



Sana booda Aayata kana qara'an: "Warri waan Rabbiin tola Isaa irraa isaaniif kenneen don'oomanu inni isaaniif gaarii ta'uu hin yaadin. Dhugumaatti inni isaaniif badaadha. Fuulduratti wanti isaan ittiin don'ooman Guyyaa Qiyaamaa (bofa ta'ee) isaanitti fannifama. Dhaalli samiifi dachii kanuma Rabbiiti. Rabbiinis waan isin dalagdan beekaadha. (Aala Imraan:180)." Bukhaariitu gabaase.

Zakaan waa afur keessatti dirqama taati. Kan duraa midhaaniifi fuduraa dachii irraa bahu. Lammafaan beelladoota tikfamtu. Sadaffaan warqeefi meetiidha. Kan dhumaan qabeenya daldalaati.

Gosoota afran kana hundaafuu nisaaba⁽¹⁾ murtaa'aa kan zakaan sanaa gaditti dirqama hin taanetu jira. Nisaabni midhaaniifi fuduraa fe'isa shan. Fe'isni tokko saa'ii Nabiyiitiin ﷺ saa'ii jahaatama. Fe'isni shanan kun tamrii, zabiiba, qamadii, ruuzii, garbuu yookiin ksf ta'us saa'ii Nabiyiitiin ﷺ saa'ii dhibba sadii ta'a. Saa'iin tokko harka nama uumamni isaa jiddu galaatiin hammaarrii harkaa guutuu afuri. Kana irraa kan dirqama ta'u yoo midhaan yookiin fuduraan sun rakkoon maleetti waan akka roobaafi laggeen callisee yaa'uun guddate ta'e tokko kurnaffaa isaa zakaa kennuudha. Yoo ta'aabii akka waraabani obaasutiin yookiin maashinii bishaan baasuun

¹ Nisaaba jechuun hanga qabeenyaan kan zakaan irratti dirqama ta'uudha. Nisaaba guutuu kan jedhamu baay'inni qabeenyichaa hanga zakaa keessaa baasuun ajajame ga'uudha. Namni hanga murtaa'e kana hin qabne zakaan isa irra hin jiru.

obaafame ta'e immoo zakaan isa keessatti dirqama ta'u tokko digdammaffaadha. Kanaan hadiisni Ergamaa Rabbii ﷺ irraa sahiihaa ta'ee dhufeera.

Nisaabni tikfamtoota gaalaa, looniifi busaa'ee keessatti immoo hadiisa sahiihaa ta'e keessatti Ergamaa Rabbii ﷺ irraa ibsamee jira. Namni baruu fedhe waa'ee isaa keessatti beektota gaafachuu danda'a. Odoo gabaabsuu fedhuu baannee silaa asittis ni dubbanna ture.

Nisaabni meetii (fiddaa) immoo misqaala dhibbaafi afurtama. Inni dirhama Arabaa kan biyya Su'uudii duraaniitiin ryaala shantamii jaha. Nisaabni warqee immoo misqaala digdama. Qixni isaa juneehii Su'uudiitiin juneehii kudha tokkofii sadii torboffaa (11 3/7) ta'a. Giraamaan immoo sagaltamii lama⁽¹⁾ ta'a. Dirqamni isaanlamaan keessa jiru tokko

¹ Ibsi sheekni asirratti ibsan baay'een isaa nama biyya sanaatiif malee hin ifu. Kanaafuu akka namni kitaabicha dubbisu kana hubatuuf ibsan kitaabolee kiyya baay'ee keessatti barreesse asittis isiniifin kaa'a. Innis odoo hadiisan jalqabnee gaariidha. Hadiisa Aliyyi bin Abii Xaalib keessatti akka dhufetti Ergamaan Rabbii ﷺ ni jedhan: "Yeroo dirhama dhibba lama qabaathee waggaa ishee irra naanna'e (zakaan) dirhama shantu irra jira. (Warqee keessaa immoo) hanga diinaaraa diigdama gahutti zakaan homaa isarra hin jiru. Yeroo diinaaraa diigdama qabaathee waggaa irra naanna'e (zakaan) walakkaa diinaaraatu ishee keessa jira." Hadiisicha Khamsatu baase. Sanada isaa immoo Bukhaarii Albaaniin faan sahiihaa godhan. Haafiz Ibn Hajar immoo hasan godhe. Ergamaan Rabbii ﷺ ni jedhan: "Meeta uuqiyyaa shanii gadi keessa zakaan hin jiru." Bukhaarii fi Muslimgu gabaase. Uuqiyyaan tokko dirhama afurtama. Uuqiyyaan shan immoo dirhama dhibba lama ta'a. Gara madaala ammayyaatti immoo 595gm ta'a. Nisaabni warqee immoo diinaara diigdama. Inni kun gi-



raama 85 ta'a. Yaanni filatamaan isa kana. Ibn Baaz garuu sagaltamii lama jedhan. Namni tokko yeroo qabeenya hanga kanaa qabaatee waggaan isa irratti naanna'e 1/40 qabeenyichaa yookiin 2.5% zakaa kennuu Isa irratti dirqama ta'a.

Fakkeenyaaaf: Namni warqee walakkaa kiilo garaamaa (0.5kg) qabaatee waggaan isa irratti naanna'e zakaan isa irratti dirqama ni ta'a moo hin ta'u? Yoo dirqama ta'eef immoo hangam kennuu qaba?

Deebii

Warqee keessatti zakaan dirqama kan ta'u yoo 85gm gahe. Kun immoo 0.5kg yookiin 500gm. Kanaafuu zakaan dirqama itti ta'a.

Hangi isa irratti dirqama ta'u immoo 1/40 qabeenyichaa yookiin 2.5% dha.

$$\text{Kan kennamu} = \frac{1}{40} * 500\text{gm}$$

$$= 12.5\text{gm}$$

Kana jechuun kan abbaa qabeenyichaa irratti dirqama ta'u warqee giraama kudha lamaa fi walakkaa kennuu dha.

Zakaan qarshii waraqaa keessaa ba'u qabu

Yeroo ammaa kana ummata biratti qarshii warqeefi meetaatiin hojjachuun waan baay'ee xiqaatee qarshii waraqaa bakka bu'eef gaaffiin biraan beektotatti uumame. Innis akkamitti zakaan maallaqa waraqaa kana irraa bahuu qaba kan jedhuudha. Akkuma beekamu yeroo ammaa kana qarshii waraqaa maallaqa of danda'aa ta'ee addunyaa irratti hojjataara. Wanti ummanni itti walii gale hundinuu maallaqa ta'u waan danda'uuf sababni warqeetu qabsiifamee liqeef-fatame yookiin immoo isaan kun damee dhuma warqee fi fiddaati waan jedhamu homaayyuun hin qabu. Akka addunyaatti dandeet-tiin biyyattii ilaalamjee walii galteedhaan hangi qarshii isaa madaalu qabu murtaa'a. Kun immoo waan shari'aan maallaqa warqee fi meeta qofatti hin gabaabsineef rakkoo homaayyuun hin qabu. Kana irratti hundaa'uun zakaan isaa hagam irraa ta'u qaba kan jedhus gaaffii biraan uuma.

Nisaaba maallaqa waraqaa (hangi zakaan irraa kennamuu qabu)

Dogongorri guddaan tokko kan biyya keenya keessatti uumame jecha 'fiddaa' jedhu birrii jedhanii hiikuudhaan zakaan birrii 200 irratti dirqama ta'a nama jedhutu jira. Kan nama ajaa'ibu immoo jechi kun namuma maqaadhaaf beekaa jedhamu irraa dhaga'amuu isati.

digdammaffaadha. Kunis yeroo waggaan irra naanna'eedha. Bu'aan walakkaan argamu immoo qabeenya isa bu'uuraa hordofa malee waggaan haaraan isaa hin lakkaa'amu. Akkasumas wanti beelladoota irraa dhalattu warruma jalqabaa hordofti malee yeroon haaraan isheedhaaf hin shallagamu.

Maallaqni waraqaa yeroo ammaa ittiin hojjatamus murtiin isaa kanuma warqeefi fiddaati. Maallqani kun dirhama, diinaara, doolaara yookiin kan biroos haa moggaafamuu

Beektota waa'ee kanaa dubbatan irraa namni tokkollee kana hin jenne. Haa ta'u beektonni maal jedhan ree? Beektota ammayyaa irraa gariin isaanii qarshiiin kan zakaan irraa bahuu qabu meeta (fiddaati) madaalamee ta'u qaba jedhantu jira. Sababni isaan dhiheessanus isatti madaaluun hiyyeessaaf bu'aa qaba kan jedhuudha. Ulamooni baay'een immoo zakaan maallaqa waraqaa kan ba'u qabu warqeefti madaalameeti jedhu. Sababni isaan dhiheessanus zakaan warqee kan dirqama ta'u baay'inni qarshii isaa zakaan kan birootin walitti dhi-haata kan jedhuudha. Kana jechuun yoo fiddaadhaan madaalleef qarshii xiqqoo keessatti zakaan dirqama ta'a. Qarshii sun immoo waan hoolaa lama yookiin sadi hin binne ta'a. Akka shari'aatti immoo hoolaanuu hanga afurtamaa guuttutti zakaan irra hin jiru. Kanaafuu zakaan kan ta'u qarshii sun warqeedhaan wal biratti ilaalamee ta'u qabu kan jedhuudha. Yaanni inni lammataa kan zakaan maallaqa waraqaa warqeedhaan madaalamee kafalamuu qabu jedhu sirrii ta'u hin hafu. Sababni isaaas Rabbiin nama hoolota soddomii sagal qabu hiyyeessatti lakkaa'ee nama qarshii fiddaa dirhama dhibba lama qofa jijjiiru qabu kan hoolaa tokko seeraan bituu hin dandeeneye durees-satti lakkaa'ee zakaan dirqama itti hin godhu. Kana irraa ka'uudhaan zakaan kan qarshii irratti dirqama ta'u yoo qarshii warqee giraama saddeetamii shan(85gm) bituufi isaa ol jiraatee waggaan itti naanna'e qofa. Mee yaada kana fakkeenyaa haa ibsinu.

Namni tokko birrii kuma soddoma kan waggaan itti naanna'e lafaa qaba. Zakaan isa irratti dirqama ni ta'aa?

Deebii

Yeroo hangi isaa nisaaba fiddatiin yookiin warqeetiin wal qixxaatee waggaan irra naanna'e zakaan ishee keessatti dirqama ta'a. Maallaqatti kan dhaqqabsiifamee zakaan keessa jiraatu faaya dubartootaa kan nisaaba guutee waggaan irra naanna'eedha. Oggas yoo itti fayyadamuu yookiin ergisaaf qophaa'es jechoota lamaan beektotaa keessaa isa irra sirriidhaan zakaan ishee keessa jira. Sababni isaa jechi Ergamaa Rabbii ﷺ inni "abbaan qabeenya warqee yookiin meetii kan zakaan ishee hin kennine yeroo Guyyaan Qiyaamaa gahe maadii ibiddaa irraa taatee isaaaf afamtee ibidda jahannamaa keessatti ishee irratti gubamee gurracheffamu malee hin hafu" jedhu hunduma of keessatti qabata waan ta'eefi. Akkasumas ergamaan Rabbii ﷺ harka dubartii tokkootti gumee warqee irraa ta'e lama arganii "sila zakaan isa kanaa ni kennitaa?" jedhaniin. Hin kennu jette. "Rabbiin Guyyaa Qiyaamaa isaan lamaaniin gumee ibidda irraa ta'e lama sitti kaa'uu ni jaallattaa?" jedhaniin. Isaan lamaan baaftee "isaan lamaan Rabbiifi Ergamaa isatiif (arjoomeera)" jette. Abuu Daawudiifi Nasaa'iitu sanada Hasaniin gabaasan. Akkasumas Ummu Salamaa irraa kan mirkanaa'e isheen faaya adii warqee irraa ta'e uffatti ture. Ergamaa Rabbiiitiin ﷺ 'isheen Kuusaa namni ittiin adabamu Qur'aana keessatti dubbatameedha?' jette. Ergamaan Rabbii ﷺ ni jedhan: "waan zakaan irraa kennamuu gahee zakaan isaa kennite issa keessa hin seenu." Hadiisoleen biraa hiika kana qabanis baay'eedha.



Meeshaa daldalaan kan jedhame immoo meeshaa gurgurtaadhaaf qophoothedha. Isheen dhuma waggaatti tilmaamamtee tokko afurtammaffaan ishee zakaa kennama. Ragaan hadiisa Samuraa kan "Ergamaan Rabbii ﷺ waan gurgurtaadhaaf qopheessinu irraa sadaqaa baasuu nu ajaju turan" jedhuudha. Abuu Daawudtu gabaase.

Manneen, gamooleen, konkolaataan, meeshaan bishaan ol baasuufi kkf kan gurgurtaaf qophaa'an hunduu kana keessa seenu. Gamoleen kiraadhaaf qophaa'an immoo zakaan yeroo waggaan irra naanna'e qarshii kira keessa jira malee ishee keessa hin jiru. Sababni isaaas isheen gurgurtaadhaaf waan hin qophaa'iniif. Akkasuma konkolaataan dhuunfaa abbaan itti fayyadamuudhaaf bitate yeroo gurgurtaadhaaf hin qophaa'in zakaan keessa hin jiru. Yeroo abbaa konkolaataatiif qarshiiin kira konkolaataafi kan biraa wanti walitti nisaaba zakaan gahu jiraate yeroo waggaan irra naanna'e zakaan irra jira. Kun immoo qallabaaf, fuudhaaf, qehee bituuf, hidaa kaffaluuf yookiin kan biraatiif qophaa'us waluma qixa. Ragaan jiru zakaan waan akkanaa hunda keessattuu dirqama ta'uu akeeka. Jechoota beektotaa keessaa inni irra sirriin hidaan zakaan hin dhorgu kan jedhuudha.

Akkuma kana qabeenyi yatiimaafi maraattuu yeroo nisaabni guutee waggaan irra naanna'e jumhuura biratti zakaan irratti dirqama ta'a. Waliyyoota (itti gaafatamtoota) isaanii irratti yeroo waggaan guute niyyaa isaanitiin baasuun dirqama ta'a. Waan ragaan hunda isaanitiu





walitti qabatuuf. Fakkeenyaaf jecha Ergamaa Rabbii ﷺ kan yeroo Mu'aaziin Yamanitti ergan “Rabbiin zakaa dureessa isaanii irraa fuudhamee hiyyeyyii isaanii irratti deebifamu qabeenya isaanii keessatti dirqama isaan irratti godheera.”

Zakaan haqa Rabbii waan ta'eef nama ishee fudhachuun hin malleef hin kennamu; abbaan sun bu'aa ittiin argachuun yookiin rakkoo ittiin of irraa deebifachuuunis hin ta'u. Qabeenya isaas isheedhaan tikfachuun hin ta'u. Akkasumas arraba sodaadhaaf qabeenya isaa bakka buusee ishee hin kenuu. Inumaa Muslima irratti kan dirqama ta'u zakaa isaa nama fudhachuu haqa godhatuuf kaayyoo biraatiif odoo hin ta'in fira ta'us isaaaf kennuudha. Kunis lubbuun itti gammaduufi Rabbiif qulqulleessee gochuu waliin ta'uu qaba. Kanaan dirqama isaa bahatee mindaa guddaafi bakka buufamuu haqa godhata.

Rabbiin kitaaba Isaa keessatti gosa warra zakaan fudhatanii ibseera. Rabbiin ol ta'e ni jedhe:

﴿إِنَّمَا الصَّدَقَتُ لِلْفُقَرَاءِ وَالْمَسْكِينِ وَالْعَمَلِينَ عَلَيْهَا وَالْمُؤْلَفَةُ فُلُوْبُهُمْ وَفِي
الرِّقَابِ وَالْعَتَمِينَ وَفِي سَبِيلِ اللَّهِ وَأَبْنِ السَّبِيلِ فِي ضَيْكَةٍ مِّنْ أَنَّ اللَّهَ وَاللَّهُ عَلَيْهِ
حَكِيمٌ﴾ [التوبه: ٦٠]

“Zakaan (kan qoodamtu) dhabeeyyiif, hiyyeyyiif, warra ishee irratti hojjataniif, warra onneen isaanii (Islaamummaa) barsiifantuuf, gabra bilisoomsuuf, warra idaan irra jiruuf, warra karaa Rabbii keessaatiifi



kara deemaadhaaf (qofa). Dirqama Rabbi irraa ta'e (qabadhaa). Rabbiinis beekaa, ogeessa.”

Aayata kabajamtuu kana Maqoolee Rabbii gurguddoo kana lamaaniin xumuru keessa Rabbii ol ta'e biraakka Rabbiin haala gabroota isaa beeku, isaan irraa eenyu akka zakaa fudhachuu haqa godhatuufi eenyu akka haqa hin godhanne ibsuutu jira. Inni sharii'aafi qadara Isaa keessatti ogeessa. Wantoota kamuu bakka Isaaaf malu malee hin kaa'u. Garuu gariin iccitii ogummaa Rabbii namoota garii dhokachuu ni danda'a. Kunis akka namoonni sharii'aaf Isaatti tasgabbaa'anii murtii Isaatiif harka kennaniif.

Nuufi Muslimoota hunda amantii Rabbii hubachuu, Rabbii waliin dhugaa hojjachuu, waan Isa jaalachiisu keessatti ariifachuufi waan dallansuu Isaa namarra qubsiisu irraa nagaa ta'uu akka Rabbiin nu qunnamun kadha. Inni dhaga'aaf dhihoo waan ta'eef. Rabbiin gabricha Isaaif Ergamaa Isaa Muhammad, maatii isaaniifi sahaabota isaanii irratti rahmataafi nageenya haa buusu.





BARRUU LAMMAFFAA SADARKAA SOOMA RAMADAANAAFI SALAATA ISAA

Akkasumas hukmiiwwan barbaachiftuu nama garii irratti dhokattuu waliin

﴿ Maqaa Rabbii akkaan mararfataa rahmata godhaa ta'eetiin

Alhamdu lillahi Rabbil aalamiin.

Nageenyi, rahmanni Rabbiifi barakaan Isaa isinirra haa jiraatu.

Kana booda:

Kun ergaa gabaabduu sadarkaa ramadaanaa, salaata isaafi isa keessa hojii khayriitti wal dorgomuu qabutti rarra'uudha. Akkasumas hukmiilee barbaachiftuu namoota garii irratti dhokattu ni qabdi.

Ergamaan Rabbi ﷺ akka isaan sahabota isaanii jiini Ramadaanaa dhufuudhaan gammachiisan mirkanaa'eera. Akkasumas akka inni ji'a hulaaleen jannataa keessa banamu, hulaaleen ibiddaa keessa cufamuufi shayxaanoniisa keessa hidhaman isaanitti himu turan.





Ergamaan Rabbii ﷺ ni jedhan:

عن أبي هريرة ﷺ قال: قال رسول الله ﷺ: «إذا كان أول ليلة من رمضان صفت الشياطين، ومردة الجن، وغلقت أبواب النار، فلم يفتح منها باب، وفتحت أبواب الجنان فلم يغلق منها باب، ونادى مناد يا باغي الخير أقبل، ويَا باغي الشر أقصر، والله عتقاء من النار».

“yeroo jalqabni halkan Ramadaanaa seene hulaaleen jannataa ni babbanamti; hulaan kamuu ishee irraa hin cufamu. Hulaaleen jahannamaas ni cuccufamti; hulaan kamuu isheerra hin banamu. Shayxaanonne ni hidhamu. Lallabaan tokko waamee ‘yaa nama toltaa feetu kottu (khayrii irratti jabaadhu); yaa nama hamtuu feetu gabaabbadhu (yeroo hamtuutii miti)’ jedha. Rabbiif namoota ibidda irra bilisoomfamantu jira. Kun immoo halkan hunda.”

Amman Nabiyyiin ﷺ ni jedhan:

كان ﷺ يبشر أصحابه: « جاءكم شهر رمضان شهر بركة، يغشاكم الله فيه، فينزل الرحمة، ويحط الخطايا، ويستجيب الدعاء، ينظر الله إلى تنافسكم فيه، فيباهي بكم ملائكته، فأروا الله من أنفسكم خيراً، فإن الشقي من حُرم فيه رحمة الله » (رواه الترمذى، وابن ماجة).

“jiini Ramadaanaa isinitti dhufeera. Inni ji'a barakaan Rabbiin isa keessa isin haguuguudha. Rahmata ni bubuusa. Badiis ni harcaasa. Du'aa'iis ni qeebala. Rabbiin kan isin isa keessa wal dorgomtan ilaalee, isiniin maleykota isaatti dhaaddata. Lubbuu keessan irraa waan gaarii Rabbitti mullisaa; hoonga'aa namaa jechuun nama isa keessa rahmata Rabbii hoonga'eedha.”

Ammas Ergamaan Rabbii ﷺ ni jedhan:

قال ﷺ: «من صام رمضان إيماناً واحتساباً غفر له ما تقدم من ذنبه». قال ﷺ: «من قام رمضان إيماناً واحتساباً غفر له ما تقدم من ذنبه». قال ﷺ: «من قام ليلة القدر إيماناً واحتساباً غفر له ما تقدم من ذنبه».

“namni haala iimaana qabuufi mindaa isaa Rabbirratti herreggatuun Ramadaana soome yakka isaa irraa wanti tare isaaf dhiifama.

Ammas namni haala iimaana qabuufi mindaa isaa Rabbirratti herreggatuun ji'a Ramadaanaa keessa (salaata laylii) salaate yakki isaa darbe isaaf dhiifama. Akkasuma namni haala iimaana qabuufi mindaa isaa Rabbirratti herreggatuun Laylatul qadrii (halkan kabajamtuu) keessa salaate badiin isaa tare isaaf dhiifama.”

Ammas Ergamaan Rabbii ﷺ ni jedhan: Rabbiin ol ta'e ni jedhe:

عن أبي هريرة ﷺ، قال: قال رسول الله ﷺ: «كُلُّ عَمَلٍ لِبْنُ آدَمَ يُضَاعِفُ، الْحَسَنَةُ عَشْرُ أَمْثَالِهَا إِلَى سَبْعِمِائَةِ ضَعْفٍ، قَالَ اللَّهُ عَزَّ وَجَلَّ: إِلَّا الصَّوْمُ، فَإِنَّهُ لِي، وَأَنَا أَجِزِي بِهِ، يَدْعُ شَهْوَتَهُ وَطَعَمَهُ مِنْ أَجْلِي» . رواه مسلم (1151).

“hojiin ilmaan Aadam hunduu mindaan toltaa isaa fakkii isaa kudhanii hanga dhibba torbaatti isaaf jira. Soomni qofti odoo hafuu; inni kiyya. Anatu isaan mindeessa. Fedhii isaa, nyaata isaafi dhugaatii isaa anaaf jecha dhiise. Nama soomuuf gammachuu lamatu jira. Gammachuun tokko yeroo fixrii isaa yoo ta'u kaan immoo yeroo Rabbii





isaa qunnamuudha. Wallaahii foolii afaan nama soomuutu Rabbiin biratti foolii miskii irra caala.” Hadiisonni sadarkaa sooma Ramadaanaafi salaataa isaa akkasumas sadarkaa sooma biroo keessatti dhufan baay’eedha.

Mu’uminaaf carraa kanatti fayyadamuutu isarraa barbaadama. Innis waan Rabbiin ji’aa Ramadaanaa isa dhaqqabsiisuun tola isarratti oole waan ta’eef hojii toluntuuti ariifatee, yakka irraa eeggechuudhaan waan Rabbiin dirqama isarratti godhe keessumaa kan akka salaata shananii waan utubaa Islaamaafi booda shahaadaa lamaaniitii irra guddoo dirqamaa taateef sirnaan raawwachuuudhaaf qabsaa’uu qaba. Muslimaafi Muslimittii hunda irrattuu ishee eeggachuuun, khushuu’aaifi tasgabbiidhaan yeroo ishee keessatti ishee raawwachuuun dirqama ta’aa.

Irra yaachiftuun dirqama salaata shanan kanaa dhiira irratti jamaa’aadhaan mana Rabbii ishee ol kaafamuufi maqaan Rabbii keessatti dubbatamuu inni eeyyame keessatti sirnaan raawwachuuudha. Rabbiin ol ta’ee ni jedhe: “Salaata seeraan salaataa; zakaas kennaa. Warra salaatuutu waliin salaataa.”

Ammas Rabbiin ol ta’ee ni jedhe:

﴿ حَفِظُوا عَلَى الصَّلَاةِ وَالصَّلَوَاتِ وَالرُّسْطَنَ وَقُوْمُوا لَهُ قَبْتَيْنِ ﴾ [البقرة: ٢٢٨]

“Salaatowan irratti, keessattuu salaatattii giddu galeessaa irratti tikfadhaa. Haala Rabbiif ajajamoo taataniinis dhaabbadhaa.” (Albaqaraa: 238).

Rabbiin ni jedhe:

﴿ قَدْ أَفْلَحَ الْمُؤْمِنُونَ ۝ الَّذِينَ هُمْ فِي صَلَاتِهِمْ حَشِيعُونَ ۝ وَالَّذِينَ هُمْ عَنِ الْغُرْبَةِ مَعْرُضُونَ ۝ وَالَّذِينَ هُمْ لِلرَّكْوَةِ فَنَجِلُونَ ۝ وَالَّذِينَ هُمْ لِثَرْوَجِهِمْ حَفَظُونَ ۝ إِلَّا عَلَى أَرْوَاحِهِمْ أَوْ مَا مَلَكُتَ أَيْمَانُهُمْ فَإِنَّهُمْ غَيْرُ مَأْمُونِينَ ۝ فَمَنِ ابْتَغَ رَزَّاقَ ذَلِكَ فَأُولَئِكَ هُمُ الْعَادُونَ ۝ وَالَّذِينَ هُرُّ لِأَمْنِيَّتِهِمْ وَعَهْدِهِمْ رَعَوْنُ ۝ وَالَّذِينَ هُرُّ عَلَى صَلَواتِهِمْ بِحَمَاطِهِنَّ ۝ وَالَّذِينَ هُمُ الْوَرِثُونَ ۝ الَّذِينَ يَرِثُونَ الْقَرْدَوْسَ هُمْ فِيهَا خَلِيلُونَ ۝﴾

[المؤمنون: ١١-١]

“Dhugumatti, mu’uminoonni milkaa’an.”

“Isaan warra salaata isaanii keessatti khushuu’a qabaniidha.”

“Isaan warra wanta bu’aa hin qabne irraa garagalaniidha.”

“Isaan warra zakaas raawwataniidha.”

“Isaan warra qaama saalaa isaanii tikfatoo ta’aniidha.”

“Haadha manaa isaanii yookiin waan mirgi isaanii dhuunfatte irratti malee. Dhugumatti, isaan komatamoo miti.”

“Namni sanaan ala (waan bira) barbaade, isaan sun daangaa dabroodha.”

“Isaan warra amaanaa isaaniitiifi waadaa isaaniis tikfatoo ta’aniidha.”

“Isaan warra salaata isaanii irratti tikfataniiidha.”

“Isaan sun isaanuma qofatu dhaaltota (jannataati).”

Isaan ishee keessatti hafuu ta’anii Firdawsiiin dhaalu.





Nabiyyiin ﷺ ni jedhan:

قال ﷺ: «العهد الذي بيننا وبينهم الصلاة، فمن تركها فقد كفر». شهادة أن لا إله إلا الله، وأن محمدا رسول الله، وإقام الصلاة، وإيتاء الزكاة، وحج

البيت، وصوم رمضان». رواه البخاري ومسلم .

“waadaan jidduu keenyaafi jidduu isaanii (munaafiqootaa) jiru salaata. Namni ishee dhiise dhugumatti kafareera (waadaan dhiiga isaa tiksuni sun citeera).”

Booda salaataatiir irra guddaan dirqamaa zakaa kennuudha. Rabbiin ol ta'e ni jedhe:

﴿وَمَا أُمِرْتُ إِلَّا يَعْبُدُوا اللَّهَ مُخْلِصِينَ لَهُ الَّذِينَ حُنَفَاءٌ وَقَوْمُوا الصَّلَوةَ وَيُؤْتُوا الزَّكُوْةَ وَذَلِكَ دِينُ الْقِيَمَةُ﴾ [البينة: ٥]

“Rabbiin qofa gabbaruu, qajeelani amantii Isa qofaaf qulquelleessuu, salaata dhaabuufi zakaa kennuutti malee homaa hin ajajamne. Kun immoo amantii qajeelaadha.” (Albayyinah: 5).

Ammas Rabbiin ol ta'e ni jedhe: “akka milkoftaniif jecha salaata seeraan salaataa; zakaa kennaa; ergamichaafis ajajamaa.”

Qur'aanni Rabbii guddaafi hadiisni ergamaa Isaa kabajamaan akka namni zakaa qabeenya isaa hin kennine Guyyaa Qiyaamaa ittiin adabamu akekeera.

Irra guddaan dirqamaa booda salaataafi zakaatii sooma Ramadaanaati. Inni tokkoon arkaana Islaamaa isa jecha Ergamaa Rabbii ﷺ kana keessatti dubbatameedha:

عن ابن عمر ﷺ قال: سمعت رسول الله ﷺ يقول: «بني الإسلام على خمس:

“Islaamni waa shan irratti ijaarame: ‘dhugaan gabbaramaan Rabbiin malee hin jiru; Muhammad immoo Ergamaa isaatii’ ragaabahuu, salaata sirna ishee guutanii salaatu, zakaa kennuu, Ramadaanaa soomuufi Manicha (ka’abaa) hajja’uudha.”

Muslima irratti soomaafi salaata isa keessa salaatu kana jechaafi gocha Rabbiin haraama godhe irraa tiksuni dirqama ta'a. Sababni isaas kaayyoon soomaa Rabbiin buluu, ajaja isaa kabajuu, akka lubbuun fedhii ishee dhiiftee Rabbii isheetiin bultu isheen qabsaa'uufi waan Rabbiin haraama godhe irraa obsuu barsiisuudha waan ta'eefi. Kaayyoon isaa nyaata, dhugaatiifi waan sooma fursiisu qofa dhiisuu miti. Kanaafuu Ergamaa Rabbii ﷺ irraa kan armaan gadii mirkanaa'e:

قال ﷺ: «الصَّيَامُ جُنَاحٌ، فَلَا يَرْفَثُ وَلَا يَجْهَلُ، وَإِنْ أُمِرْتُ قَاتِلَهُ أَوْ شَانِمَهُ، فَلَيَقْتُلُ إِنِّي صَائِمٌ -مَرْئَتِينِ- وَالَّذِي نَفْسِي بِيَدِهِ لَخُلُوفٌ فِيمَا الصَّائِمُ أَطْبَيْتُ عَنْهُ اللَّهُ -تَعَالَى- مِنْ رِيحِ الْمُسْكِ، بَتَرَكْ طَعَامَهُ وَشَرَابَهُ وَشَهْوَتَهُ مِنْ أَجْلِي، الصَّيَامُ لِي وَأَنَا أَجْزِي بِهِ، وَالْحَسَنَةُ بِعَشْرِ أَمْثَالِهَا». أخرجه البخاري.

“soomni gaachena. Yeroo guyyaan sooma tokkoo keessanii argame haasaa sagaagalaa hin haasa'in; hin iyyin. Yoo namni tokko isa arrabse yookiin ittiin lole ani nan soomaaraa haa jedhu.”



Ammas Ergamaan Rabbii ﷺ ni jedhan:

قال ﷺ: «مَنْ لَمْ يَدْعُ قَوْلَ الْذُورِ وَالْعَمَلَ بِهِ فَلَيْسَ لِلَّهِ حَاجَةٌ فِي أَنْ يَدْعُ طَعَامَهُ وَشَرَابَهُ». رواه البخاري.

“namni haasawa kijibaa, ittiin hojjachuufi nama miidhuu hin dhiisin, nyaataafi dhugaatii isaa dhiisuu keessa Rabbiiif dhimmi hin jiru.”

Ragoolee kanaafi kan biroo irraa kan hubatamu, wanti nama soomu irratti dirqama ta’u waan Rabbiin haraama isarratti godhe hunda irraa fagaachuufi waan Rabbiin dirqama isarratti godhe hunda eeggachuudha. Kanaan araaramni, ibidda irraa bilisa bahuun, soomaafi salaanni isaa qeebalamuun isaaaf kajeelama.

Bakka kanatti qabxiileen namoota garii irratti dhokatan ni jiru: Sana keessaa tokko kan Muslima irratti dirqama ta’u Rabbitti amanee mindaa isaa Rabbirratti herreggataa soomuu qaba malee riya’ii (nama agarsiifanna), dhageessifanna, namoota hordofee yookiin maatii isaa jala deemeey yookiin ummata biyya isaa hordofeetii miti. Kan soomuutti isa kaasu Rabbitu dirqama natti godhee amanee sana keessatti mindaa isaa Rabbii isaa biratti shallagatee ta’uu qaba. Akkuma kana salaanni halkanii kan Ramadaanaa Muslima hunda irratti iimaanaafi mindaa isaa herreggachuudhaan salaatuutu dirqama ta’ a. Kaayyoo biraatiin hin ta’u. Kanaafuu Ergamaan Rabbii ﷺ jedhan

قال ﷺ: «مَنْ صَامَ رَمَضَانَ إِيمَانًا وَاحْتِسَابًا غُفِرَ لَهُ مَا تَقَدَّمَ مِنْ ذَنْبِهِ». قال ﷺ: «مَنْ قَامَ رَمَضَانَ إِيمَانًا وَاحْتِسَابًا غُفِرَ لَهُ مَا تَقَدَّمَ مِنْ ذَنْبِهِ».

قال ﷺ: «مَنْ قَامَ لِلَّهِ الْقَدِيرِ إِيمَانًا وَاحْتِسَابًا غُفِرَ لَهُ مَا تَقَدَّمَ مِنْ ذَنْبِهِ».

“namni haala iimaana qabuufi mindaa isaa Rabbirratti herreggatuun Ramadaana soome yakka isaa irraa wanti tare isaaaf dhiifama. Ammas namni haala iimaana qabuufi mindaa isaa Rabbirratti herreggatuun ji’ a Ramadaanaa keessa (salaata laylii) salaate yakki isaa darbe isaaaf dhiifama. Akkasuma namni haala iimaana qabuufi mindaa isaa Rabbirratti herreggatuun Laylatul qadrii (halkan kabajamtuu) keessa salaate badiin isaa tare isaaaf dhiifama.”

Ammas dhimma hukmiin isaa nama garii irratti dhokatu keessaa tokko: madaa, funuuna, balaqqama yookiin filannoo isaatiin maleetti bishaan yookiin beenzilli gara mormaa dhaqqabuun kan nama mudatuudha; kun hunduu sooma hin balleessu. Garuu namni yaadee of balaqqamsiise soomni isaa ni bada. Nabiyyiin ﷺ ni jedhan:

“Namni ol-deebisaan isa mo’ate qadaan (kaffaltiin) isarra hin jiru. Namni ofiin beekaa of balaqqamsiise haa kaffalu.”

Ammas qabxiin biraa kan nama garii dhokatu odo janaabaa hin dhiqatin hanga fajriin bahutti tursiisuudha. Akkuma kana dubartii garii immoo yoo qulqullina fajrii dura argite odo hin dhiqatin fajriin bahuutu ishee mudata. Warra kanarra soomuutu jira. Dhiqanna Isaanii hanga fajriin bahutti tursiisuu wanti dhorgu hin jiru. Garuu dhiqanna Isaanii hanga biiftuun bahutti tursiisuu hin eeyyamamu. Odo biiftuun hin bahin dhiqatanii Subhii salaatuun isaan irratti dirqama ta’ a. Namni janaabaa qabus

akkuma kana hanga biiftuun bahuutti dhiqanna tursiisuun isarra hin jiru. Inumaa odoo biiftuun hin babin dhiqatee Subhii salaatuutu irra jira. Dhiirri akka salaata jamaa'aa dhaqqabuuuf ariifachuun isarratti dirqama ta'a.

Ammas waan sooma hin balleessine keessaa kan biroo dhiiga fuudhanii qorachuufi marfee isa gulukoosiin ala jiru waraannachuudha. Garuu kana yoo hanga halkaniitti tursiisuun mijaa'eef irra filatamaadha. Sababni isaas Ergamaan Rabbii ﷺ “waan si shakkisiisu dhiisii gara waan si hin shakkisiifneetti gori” jedhan.

Ammas Ergamaan Rabbii ﷺ “namni waan wal fafakkaattuu irraa fagaate dhugumatti amantiifi kabajaa isaatiif qulqulla'eera” jedhan.

Ammas qabxiilee namoota garii dhokatu keessaa tokko salaata keessatti tasgabbii (xuma'iniinaa) dhabuudha. Salaatichi waajiba yookiin sunnaa ta'uutu mala. Hadiisonni baay'een Ergamaan Rabbii ﷺ irraa odeeoffame akka tasgabbiin arkaana salaataa, isa malee salaanni sirrii hin ta'uu akeeku baay'een dhufeera. Xumu'aniinaa jechuun salaata keessa turuufi ishee keessatti kushuu'ii qabaachuudha. Hanga lafeen dugdaa hunduu bakka qabatutti ariifachuun dhiisuudha. Namoonni baay'een Ramadaana keessa salaata taraawiihaa kan ishee hin hubanneefi ishee keessatti hin tasgabboofne salaatu; inumaa lafuma tuttumatu. Salaanni bifaa kanaan salaatamu ni bada. Abbaan akkas hojjatus dilii godhata malee hin mindeeffamu.

Ammas qabxiilee hukmiin isaa namoota garii dhokatu keessaa tokko taraawiihiin raka'aa digdama irraa hirrifamuun hin eeyyamamu jedhanii yaaduu akkasumas raka'aa kudha tokko yookiin kudha sadii irra ida'uun hin ta'u jedhanii yaaduudha. Yaanni kun hunduu sirrii miti; waan ragaa faallessuuf dogongora.

Hadiisonni baay'een Ergamaan Rabbii ﷺ irraa dhufan kan salaanni laylii dhimmi isaa ballaa akka ta'e akeekanuufi lakkofsi daangeffamaan isa faallessuun hin taane akka hin jirre akeekanu baay'eedha. Inumaa Ergamaan Rabbii ﷺ irraa akka isaan raka'aa kudha tokko, raka'aa kudha sadii salaatan akeeku yeroo bira immoo sanaa gadii salaatan akeeku dhufeera. Ergamaan Rabbii ﷺ yeroo waa'ee salaata laylii irraa gaafataman ni jedhan: “lama lamaan; tokkoon keessan yeroo Subhiin gahuu sodaate raka'aa tokko kan waan inni duraan salaate witrii (mangoo) isaaf gootu salaata.” Sahiiha ta'uu hadiisichaa irratti walii galameera.

Ramadaana keessas ta'ee Ramadaanaan alas lakkofsi raka'aa daangeffame wahii hin jiru. Kanaafuu sahaabonni bara Umar keessa yeroo garii raka'aa digdamii sadii salaatan yeroo kaan immoo raka'aa kudha tokko salaatan. Kun hunduu Umariifi sahaabota bara Isaa turan irraa mirkanaa'eera.

Salafoonni gariin Ramadaana keessa raka'aa soddomii jaha salaatanii raka'aa sadiihin witrii godhatu. Gariin isaanii immoo raka'aa afurtamii tokko salaatu. Gocha kana isaanirraa shaykhul Islaam Ibn Taymiyaafi beektooleen biroo dubbataniiru. Akka inni dubbatetti dhimmi kun ballaadha

(hin daangeffamu). Akkuma kana nama Qur'aana, rukuu'aafi sujuuda dheeresseef lakkofsa raka'aa xiqqeessuutu filatama jedhee dubbate. Namni Qur'aana, rukuu'aafi sujuuda gabaabse immoo lakkofsa raka'aa baay'isuun barbaachisaadha. Kun hiika haasawa isaati; Rabbiin isa haa marafatu.

Namni sunnaa Ergamaa Rabbii ﷺ xinxale kana hunda keessattuu filatamaan raka'aa kudha tokko yookiin raka'aa kudha sadii, Ramadaana keessaas ta'ee Ramadaanaan ala, filatamaa ta'uun bara. Sababni isaas kun gocha Ergamaa Rabbii ﷺ kan yeroo baay'eetiin wal gala waan ta'eef. Akkasumas warra salaatuuf garaa laafuu qaba; kushuu'ii qabaachuufis irra dhihoodha. Namni dabales rakkoon isarra hin jiru; gochi jibbamaanis sana keessa hin jiru.

Irra caalaan salaataa nama Ramadaana keessa imaama waliin salaateef imaamaa waliin malee raawwachuu dhiisuudha. Nabiyyiin ﷺ ni jedhan: "namichi yeroo hanga imaamni salaata fixutti isaa waliin salaate, Rabbiin salaata halkan guutuu isaaaf barreessa."

Muslimoota hundaafuu ji'a kana keessa gosoota ibaadaa kan akka salaata sunnaa, Qur'aana xinxalaafi hubannoo waliin qara'uu, tasbiha, tahlila, tahmiida, takbiiraa, istighfaara, du'aa'i sharii'aa, gaariitti ajajuu, hamtuu irraa dhorguu, gara Rabbiitti waamuu, dhabeeyyiifi hiyyeeyyii irratti ballisuu, haadhaa abbaatti tola ooluu keessatti qabsaa'uu, firooma fufuu, ollaa kabajuu, dhukkubsataa gaafachuufi wantoota biroo gosa khayrii irraa ta'e keessatti qabsaa'uuun karaa godhameera. Ergamaan Rabbii ﷺ

hadiisa dubbannee dabarsine keessatti ni jedhan: "Rabbiin kan isin isa (Ramadaana) keessa wal dorgomtan ilaalee, isiniin maleykota isaatti dhaadda. Lubbuu keessan irraa waan gaarii Rabbitti mullisaa; hoonga'aa namaa jechuun nama isa keessa rahmata Rabbii hoonga'eedha." Ammas Ergamaa Rabbii ﷺ irraa gabaafamee ni jedhan:

قال ﷺ: أن ثواب السنة في رمضان كثواب الفرض والفرض بسبعين .

"namni isa (Ramadaana) keessa hojii gosa hojiwwan khayrii irraa ta'e hojjate akka nama yeroo biraawajiba hojjatee ta'a. Namni isa keessa waajiba raawwate akka nama yeroo biraawajiba torbaatama hojjatee ta'a."

Ammas hadiisa sahiihha keessatti ni jedhan:

قال ﷺ: «عمرة في رمضان تعدل حجة – أو تعدل حجة معى».

"Umraan Ramadaana keessaah hajjii –hajjii ana waliin godhamuun- wal madaala."

Hadiisonni ji'a kana keessa gosa khayrii irratti ariifachuutti kakaasan baay'eedha.

Nuufi Muslimoota biraawajiba akka Rabbiin waan jaalalli isaa keessa jirutti nu qajeelchu, soomaafi salaata keenya nurraa qeebalu, haala keenyas nuuf tolchuufi fitnaa nama jalliftu irraa nu fageessu Rabbitu kadhatama. Akkasumas Rabbiin hoggantoota Muslimaa tolchuufi jecha isaanii haqa irratti walitti qabu kadhanna. Rabbiin abbaa kana godhuufi danda'aa waan ta'eef. Nageenyi, rahmanni Rabbii barakaan Isaa isin irraa haa jiraatu.

Itti gaafatamaa walii gala hoggansa qormaata ilmii, fatwaa, Da'awaafi qajeelfamaa.

IslamHouse.com

 IslamHouseOr

 IslamHouseOR/

 islamhouse.com/or/

 IslamHouseOr/

For more details visit
www.GuideToIslam.com



contact us :Books@guidetoislam.com

 Guidetislam.org  Guidetoislam1  Guidetislam  www.Guidetislam.com



المكتب التعاوني للدعوة وتوعية الجاليات بالربوة

هاتف: +966 11 4454900... فاكس: +966 11 44970126... ص.ب ٢٩٤٦٥: الرياض ١١٤٥٧

ISLAMIC PROPAGATION OFFICE IN RABWAH

P.O.BOX 29465 RIYADH 11457 TEL: +966 11 4454900 FAX: +966 11 4970126